

ođas 17.10.2023

Sámi dálkkádatráđđi álggahii doaimmas

Sámi dálkkádatráđđi čoahkkanii vuosttaš čoahkkimii Roavvenjárggas 13. golgotmánu. Dálkkádatráđi ulbmilin lea buktit sápmelaš diehtovuođu ja oaidninvugiid dálkkádatpolitihka válmastallama oassin.

Dálkkádatráđi váldobargun lea cealkit riikkaviidosaš dálkkádatpolitihka plánain, mat stivrejit álbmotlaš dálkkádatpolitihka ja meroštallet makkár dálkkádatdoaimmat Suomas bargojuvvojit.

”Diđolašvuođa lasiheapmi davviguovlluid ja -orruid sierradiliin lea dehálaš, go dálkkádatrievdamis leat earenoamáš stuora váikkuhusat davviguovlluide Sámi dálkkádatráđđi fállá vejolašvuođa ovddidit sápmelaččaid rivttiid dálkkádatpolitihkas ođđa vugiid mielde”, dadjá biras- ja dálkkádatministtar **Kai Mykkänen**.

Sámi dálkkádatráđđi ásahuvvui vuosttaš háve dálkkádatlága vuođu. Dat lea sorjjasmeahttun áššedovdiorgána, mas leat 12 lahtu. Bealli lahtuin ovddastit dieđaservoša ja bealli sámiid árbevirolaš dieđu eaiggádiid. Ságadoallin doaibmá dutkidoavttir **Klemetti Näkkäljärvi** Oulu universiteahtas.

”Persovnnalaččat oainnán dálkkádatráđi ságadoallivuođa oktan eanemus hástaleaddji ja seammas miellagiddevaččamus bargguin, mas lean leamaš. Lean ilus, ahte dálkkádatráđđi beasai álggahit barggus ja ahte das lei earenoamáš buorre ovttasbargovuoigŋa ja hállu duddjot buoret eavttuid dálkkádatrievdamii vuogáiduvvamii. Sámi dálkkádatráđđi lea globála dásis áidnalunddot. Dál beassat hukset málle dasa, mot eamiálbmogiid dieđut ja máhtut váldojuvvojit ovttaeardásaččat vuhtii dieđalaš barggus”, dadjá Näkkäljärvi.

”Barggu álgomuttu deaddočuokkisin bohtá leat dálkkádatráđi barggu plánen ja ordnen sihke diehtovuođu čoaggima álggaheapmi. Jáhkán, ahte dálkkádatráđđi sáhtta máksit ođđa álggu dieđaservoša ja árbevirolaš dieđu eaiggádiid ovttasbarggus”, Näkkäljärvi joatká.

Ortniiduvvančoakkámis dálkkádatráđđái välljejuvvui várresátnejodiheddji, guhte galgá leat dálkkádatráđis addojuvvon ásahusa mielde sámi árbevirolaš dieđu eaiggát. Čoakkán välljii ovttamielalaččat **Petra Biret Magga-Vars** várreságadoallin. Magga-Vars lea boazodoalli, duojár, juoigi ja dáiddár Vuohčus.

”Mii árbevirolaš dieđu eaiggádat oaidnit kultuvramet ja dan biras luonddu duovddamuitun dasa rohttahuvadettiinemet. Kultuvramet konteavsttas leat mielde ovddit buolvvaid dieđut, oahput ja rávvagat. Dađi lági mielde maiddái dálkkádatrievdama váikkuhusat registrerejuvvojit min duovddamuitui. Mis lea hui olu diehtu birrasis ja dan áiccadeamis, man sáhtta buohtastahttit dieđalaš dihtui.

Lea historjjálaš, ahte leat ovttaeardásaš sajádagas dieđaservošiin sámi dálkkádatráđis ja sáhttit ovttas ohcat čovdosiid dálkkádatrievdamii vuogáiduvvamii ja buoremus dáhpáhusas dan goahcamii”, Magga-Vars deattuha.

Vuosttaš čoakkámisttis dálkkádatráđđi plánii lagas boahhteáiggi barggus ja barggu geavada ordnema. Dálkkádatráđđi mearridii álggahit hohpolaččamussan čállingotti vuodđudeami válmastallamiid. Dálkkádatráđđi čuovvovaš čoakkán dollojuvvo 15.11.2023 Roavvenjárggas Arctic Spirit -konfereanssa oktavuodas. Dálkkádatráđđi searvá maddái Arctic Spirit -konfereanssa dieđalaš panelaságastallamii ”Dieđu ovttasbuvttadeapmi ja dálkkádatrivdan Davviriikkain”.

Lassidieđut:

Sámi dálkkádatráđđi ságadoalliu Klemetti Näkkäljärvi, klemetti.nakkalajarvi@oulu.fi, +358 40 537

[Dieđáhus sámi dálkkádatráđđi vuodđudeamis](#)